

Heilbrigðisráðuneytið
Skógarhlíð 6
105 Reykjavík

Reykjavík, 21. febrúar 2020
2001323/0.4.1/lrs

Efni: Umsögn embættis landlæknis um reglugerð um breytingu á ýmsum reglugerðum vegna útgáfu starfsleyfa og sérfræðileyfa heilbrigðisstétta (ákvæði til bráðabirgða)

Vísað er til tölvubréfs heilbrigðisráðuneytisins, dags. 31. janúar 2020, þar sem vakin er athygli á því að drög að reglugerð sem breytir ýmsum reglugerðum um starfsleyfi og sérfræðileyfi heilbrigðisstétta, hafi verið birt í samráðsgátt stjórnvalda og verði þar til umsagnar til 28. febrúar nk.

Í samráðsgáttinni kemur fram að tilefni breytinganna sé að láðst hafi að setja inn ákvæði til bráðabirgða í reglugerðir sem settar voru um hverja stétt eftir gildistöku laga nr. 34/2012 og gefa þannig þeim, sem ekki höfðu sótt um starfsleyfi eða voru enn í námi sem taka myndi breytingum við gildistöku reglugerðanna árið 2012, kost á að sækja um starfsleyfi á grundvelli þess náms sem þeir höfðu stundað. Þá segir að ákveðið hafi verið að setja inn nýja grein varðandi gildi eldri leyfa sem byggðust á fyrri réttarheimildum og að stefnt sé að því að frestur til að sækja um starfsleyfi á grundvelli ákvæða til bráðabirgða verði hálft ár frá gildistöku reglugerðarinnar.

Landlæknir telur að með þessum breytingum verði réttarstaða þeirra sem sóttu ekki um starfsleyfi/sérfræðileyfi á grundvelli námsgráðu sem aflað hafði verið fyrir gildistöku reglugerðanna árið 2012 vissulega skýrari. Hins vegar er það mat landlæknis að fyrirhugaður sex mánaða frestur til að sækja um starfsleyfi á grundvelli ákvæða til bráðabirgða sé of stuttur. Lagt er til að fresturinn verði að minnsta kosti 12 mánuðir. Þá bendir landlæknir á að óljóst sé hvernig afgreiða skuli þær umsóknir sem berast embættinu eftir það tímamark og byggjast á eldra námi, í þeim tilvikum þegar ríkari kröfur hafa verið gerðar í reglugerð viðkomandi stéttar.

Þá vekur landlæknir jafnframt athygli á því að samkvæmt upplýsingum frá Heilbrigðisskóla Fjölbautaskólans í Ármúla stunda enn um það bil 15 nemendur læknarítaranám við skólann og munu útskrifast sem læknaritarar enda hófu þeir nemendur nám sitt áður en reglugerð um heilbrigðisgagnafræðinga nr. 640/2019 tók gildi. Fyrir liggur að umræddir nemendur munu útskrifast vorið 2020 og vorið 2021 en ekki er loku fyrir það skotið að einhverjir útskrifist síðar. Til að tryggja réttindi þessara nemenda þyrfti að veita þeim lengri frest til þess að sækja um starfsleyfi sem heilbrigðisgagnafræðingar.

Samkvæmt upplýsingum landlæknis hefur nám í iðjuþjálfun við heilbrigðisvísindasvið Háskólans á Akureyri breyst í samræmi við nýja námsskrá. Vorið 2020 munu útskrifast þaðan nemar sem annars vegar hafa lokið 240 ECTS eininga BS-prófi í iðjuþjálfunarfræði og hins vegar nemar sem lokið hafa 180 ECTS BS-námi. Síðargreindi hópurinn þarf, samkvæmt nýrri samþykkt námskrá Háskólans á Akureyri, að bæta við sig 60 ECTS einingum til þess að hljóta starfsréttindi sem iðjuþjálfar. Samkvæmt núgildandi reglugerð um iðjuþjálfara er ekkert því til fyrirstöðu að þeir nemar sem ljúka 180 ECTS BS-námi geti sótt um starfsleyfi sem iðjuþjálfarar. Landlæknir telur eðlilegast að breyting verði gerð á reglugerð nr. 1121/2012 um menntun, réttindi og skyldur iðjuþjálfara og skilyrði til að hljóta starfsleyfi með sólarlagsákvæði sem kvæði á um réttindi þeirra er ljúka námi í iðjuþjálfun samkvæmt nýja fyrirkomulaginu.

Virðingarfyllst,
f.h. landlæknis,

Lilja Rún Sigurðardóttir,
lögfræðingur